

— Historia ta ripiti su mes un biaha mas

18 di maart ultimo nos a celebra un biaha mas nos dia nacional dia di Himno y Bandera, nos simbolonan di Libertad cu nos a inaugura 18 di maart 1976.

Pakico nos ta considera nos Himno y nos Bandera, simbolonan di libertad?

Pa motibo cu den e temporada ey cu nos pueblo tabata luchando duro pa nos por a logra haya Hulanda reconoce nos deseo y nos derecho di ta liber.

Himno y Bandera di un pais ta simbolonan di soberania, nan ta simbolonan di libertad.

E lucha berdaderamente a inicia tantisimo aña pasa. Nos semper a kere den reconoce tur e lidernan grandi di pasado cu a lucha fuerte pa nos pais.

Nos tin e madurez politico y personal pa acepta cu tabata tin lidernan grandi prome cu Betico.

Nos no ta sinti nos mes menaza pa historia. Ta historia ta e fundeshi di nos pais.

Ta nos historia ta locual cu a habri caminda pa nos pueblo por logra nos libertad cual lucha a worde lideriza y logra unicamente pa mi tata Betico.

Un tristo realidad si awe nos por constata: historia ta ripiti su mes. Betico a inicia su carera politico den AVP.

Despues di a resulta e vote

getter den AVP e tabata tin e derecho y e sosten pa bira lider di AVP.

AVP no a duna Betico e reconocimiento y no a hacie lider, pero ora Betico a ripara cu AVP a cumenza desvia di e lucha origina den Henny Eman Sr. y Shon A Eman, el a dicidi di sali di AVP y lanta su propio partido.

Awe nos por ripara cu historia di Eman / AVP ta ripiti su mes, pa un motibo o otro e actual lider di AVP y su partido ta sinti nan mes menaza pa e hecho cu Betico a logra pa nos, nos Status Aparte pa cual motibo nos pueblo a proclame Libertador di Aruba.

Awe na aña 1998 un biaha mas AVP no ta duna Betico e reconocimiento cu e merece, pero si kier uze den campaña politico pa finnan personal.

Esaki no ta tur! Awor nos ta ripara cu AVP ta haciendo todo por todo pa kita for di nos pueblo e hecho historico cu dia 18 di maart nos a inaugura nos Himno y nos Bandera.

AVP ta purbando pa converti e dia aki den celebracion di dia di Mocion 18 di maart 1948.

Desde 1948 te cu aña 1994 nuncà AVP a duna e fecha ni e mocion aki balor.

Ta Betico Croes cu su grandeza a escoge pa tene manifestacion masalriba 18 di

maart 1973.

Na 1976 riba 18 di maart Betico a escoge pa nos inaugura nos Himno y Bandera.

Ta Betico Croes ta esun cu a escoge pa nos derecho di nos Status Aparte worde concretiza y celebra en grande riba 18 di maart 1983.

Pues ta Betico Croes na bida ta esun cu a duna e fecha di 18 di maart balor y contenido, dunando nos Lidernan di pasado nan debido reconocimiento y balor.

E propio AVP cu awe kier cambia historia a bandona nan propio historia pa añanan largo y awor diripiente kier saca nos historia for di su contenido total y real.

Berdaderamente nunca ta laat pa duna bo hendenan e reconocimiento cu nan merece, pero no troce, no cambie.

Mucho menos no kita for di mi tata loke ta pertenece na dje. Bo no tin e derecho.

Na aña 1995 den e periodo di celebracion di Himno y Bandera mi a expresa publicamente: "esun cu ta capaz di intencionalmente gaña nos pueblo tocante nos historia, ta demostra di ta capaz di intencionalmente gaña nos tocante kico ta spera nos den futuro".

"A causa mi hopi asombro y desapunto ora mi tende sr. Eman duna reconocimiento na tres persona cu ta sr. Mito

Croes, Tico Croes y Watty Vos cu tur respet, den cuadro di nos Status Aparte. (por ta pesey awe nos tin tanto problema cu constante metemento di Hulanda den nos asuntunan interno ya cu ningun tin e corahe pa pone Hulanda respeta nos yiunan di tera di nos pais).

Pa continua, tin hopi persona mas cu a forma parti di e team negociador.

Que hubo di sr. John van der Kuyp? Que hubo di sr. Ralph Richardson? Que hubo di nos actual Gobernador señor Olindo Koolman?

Asina mi por sigui menciona hooi hende mas cu tambe a forma parti di e team.

Locual sr. Eman a haci tabata un falta di respet pa tur cu a lucha pa nos Status Aparte inclusivo nos pueblo.

Un falta di madurez politico pa un biaha mas honra solamente esnan cu ta cumbini politicamente y no tur cu merece.

Aunke bo purba bo no por kita nada for di ningun hende.

Den tur documento lo bo encontra number di tur cu a forma partido di e team mescos cu a logra haya for di Hulanda number di tur esnan cu a entrega e mocion na 1948.

Sr. Eman su problema ta cu su persona si no a forma parti di e team pasobra e no tabata kier, maske cu Betico a pidi su persona pa nan forma un bloke contra Hulanda.

E si a boicotea e negociacion di nos Status Aparte pasobra e tabata contra. E si vota contra introduccion di nos Himno y Bandera den Eilandsraad.

Pero realidad amargo pa AVP ta, cu Betico Croes ta esun cu a logra nos Status aparte y cu ta Betico Croes ta e libertador di nos pais Aruba di cual awe sr. Eman por ta su Ministro Presidente aunke demisionario.

Guisette F. Croes

18 di maart 1998

TA BENDE
Fitness-machine.
Nordic-rider nobo.
H 650,= Tel:
845697

Telefonnan di DIARIO
826747
Fax:
828551